

ԳԼՈՒԽ ԺԳ.

ՍԱՐԳԱՐԱՊԱՏ — ԲԱՇ-ԱԲԱՐԱՆ

Այսպէս էր կացութիւնը Արարատեան դաշտում, երբ, Ալեքսանդրապոլի անկումից յետոյ, Հայկական բանակի մի մասը նահանջեց Երեւանի ուղղութեամբ և կռուով հասաւ Սարգարապատ, մայիս 19-ին: Թիւրքերը նրանց հետապնդեցին երկու ճանապարհով՝ երկաթուղու ուղղութեամբ և Արագածի հիւսիս-արևելեան փէշերով:

Դրանից առաջ արդէն, Արարատեան դաշտում համախմբուած էին և Վանի ու Ալաշկերտի շրջաններից նահանջած զօրամասերը: Ապրիլի կէսերին երեւանեան նահանգում, Հայկական Չրդ դիվիզիայի պետ գօր. Սիլիկեանի հրամանատարութեան տակ, գտնուում էին Ծրդ և Յրդ գնդերը, Արդ գնդի մէկ գումարտակը և Վանի առաջին ու Չրդ գնդերը, 28 թնդանօթով:

Վանի երկու գնդերը, որոնք գրաւուած էին Բարթողեան բարձունքները, ապր. 27-ին ենթարկւեցին յարձակման թիւրքերի կողմից, որոնք, հակառակ կնքած զինադադարի, փորձեցին ա՛յս կողմից խուժել Արարատեան դաշտը: Հայկական զօրքերը ցոյց տւին բուռն դիմադրութիւն: Չրդ գունդը նահանջեց մինչև Օրգով և Արհաջ, բայց յաջորդ օր անցաւ ուժեղ հակայարձակման և արիւնահեղ ճակատամարտից յետոյ՝ յետ շարտեց թշնամուն: Սակայն, թիւրքերը ստացան օգնական ուժեր և յետ մղեցին Հայկական զօրամասը, որը ամբացաւ Խալֆայու-Սուլթանապատ դժի վրա: Կռիւները տեւեցին մօտ երկու շաբաթ: Այս կռիւներում մերոնք ունեցան մի քանի տասնեակ սպանուած և 80 վիրաւոր: Մայիս 9-ի ճակատամարտում, հերոսական մահով մեռաւ և Վանի Չրդ գնդի հրամանատար սիրուած գնդ. լեւոն Չարուխչեանը՝ հայ լաւագոյն զինուորականներից մէկը:

Ի վերջոյ, անդրկովկասեան կառավարութեան եռանդուն բողոքի վրա թիւրքերը նորից քաշւեցին Չինգիլի միւս կողմը: Հայկական զօրքերը տեղաւորւեցին Իգդիրում՝ Օրգովում ունենալով առաջապահներ: Միւս թեւը Սարգարապատ կայարանում էր՝ Կողբի առաջապահներով: Մի մաս էլ գրւած էր Արաքս կայարանում: Այսպէս մնաց դրութիւնը մինչև մայիս 15, երբ թիւրքերը դիմեցին ընդհանուր յարձակման Ալեքսանդրապոլի և, Չինգիլի վրայից, Երեւանի ուղղութեամբ և յետ մղեցին մեր զօրքերը Իգդիրից ու Կողբից մինչև Արաքս: Միաժամանակ, ոտքի ելան թուրքերն ու քրդերը, և 1918թ. մայիսի կէսերին Արարատեան դաշտը բոլոր կողմերից շրջապատեց թշնամիներով: